



NEAS NETT AS
Postboks 2260 Løkkemyra
6503 KRISTIANSUND N
Att. Ronny Holm

Saksbehandlar, innvalstelefon
Marita Fjelle, 71 25 84 61

Løyve til bruk av motorkøretøy på gbnr 24/3 - Sør-Smøla landskapsvernområde

NEAS Nett AS får løyve til bruk av motorkøretøy i Sør-Smøla landskapsvernområde for å demontere og køyre bort ein transformator, skifte to stolpar og bytte leidning.

Nærare vurdering av vedtaket er beskrive i brevet.

Vi viser til søknad av 14.09.2021 frå NEAS Nett AS om løyve til bruk av motorkøretøy inne i Sør-Smøla landskapsvernområde.

Søknaden

NEAS Nett AS ønskjer å demontere og køyre bort ein transformator som står innanfor Sør-Smøla landskapsvernområde. Transformatoren har hatt ein del lynskader i tillegg til at det har vore problem med spenningsfall grunna plasseringa av transformatoren. For kvar lynskade må dei køyre inn i verneområde med maskinelt utstyr. Som følge av arbeida ønskjer ein også å skifte to stolpar og skifte hengekabelen.

Lovgrunnlag

Søknaden er vurdert opp mot gjeldande verneforskrift, fastsett ved kgl.res 09.01.2009, sist endra 15.03.2013 (FOR-2013-03-15-284). Motorferdsel til lands er i utgangspunktet forbode i verneområdet, men Statsforvaltaren kan gje løyve til nødvendig bruk av motorkøretøy i samband med drift og vedlikehald av eksisterande kraftlinjer, jf. § 3.5.3, bokstav d).

Søknaden må også vurderast opp mot prinsippa i naturmangfaldslova §§ 8-12, jf. §7. Dette er prinsipp som omfattar vurdering av kunnskapsgrunnlag (§ 8), føre-var-omsyn (§ 9), samla belastning (§ 10), kostnader knytt til ev. skade på naturmangfald (§ 11) og miljøforsvarleg teknikk/driftsmetode (§ 12).



Statsforvaltaren si vurdering

Føremålet med Sør-Smøla landskapsvernområde er å ta vare på eit eigenarta, vakkert og internasjonalt verneverdig natur- og kulturlandskap med det biologiske mangfald som pregar området.

Inne i landskapsvernområde ligg også eit område registrert som naturbeitemark med svært høg verdi. Dette er eit kalkrikt og artsrikt område med mange sjeldne og raudlista artar. Delar av denne naturbeitemarka ligg innafor området som vil bli berørt av tiltaket.

For å unngå skade på naturmangfaldet må tiltakshavar ha rutinar som sikrar mot søl av drivstoff og olje. Eksisterande veg må nyttast så langt det er mogleg for å unngå unødvendig skade på vegetasjonen.

Vi har kome fram til at det berørte arealet av tiltaket utgjør ein så liten del av naturbeitemarka og landskapsvernområdet at verdiane samla sett ikkje vil få nemnande skade lokalt eller regionalt.

Vi har lagt vekt på at det å flytte transformatoren er nødvendig i samband med drift og vedlikehald av eksisterande kraftlinjer. Tiltaket er samstundes positivt for å redusere framtidig motorferdsel innanfor både verneområdet og naturbeitemarka.

Statsforvaltaren meiner det ligg føre tilstrekkeleg kunnskap om verknaden av tiltaket til å kunne fatte eit vedtak. Føre-var-prinsippet får difor ikkje vekt. Tiltaket er etter dette vurdert i tråd med saksbehandlingsreglane i naturmangfaldlova §§ 8-12.

Vedtak

Statsforvaltaren gir NEAS Nett AS løyve til bruk av motorkøretøy i Sør-Smøla landskapsvernområde for å demontere og køyre bort transformatoren, slik det går fram av søknad av 14.09.2021. Heimel for vedtaket er § 3.5.3, bokstav d i verneforskrifta for Sør-Smøla landskapsvernområde.

Vilkår for løyvet:

- NEAS Nett AS må ha rutinar som sikrar mot akutt forureining.
- Skade på vegetasjonen som følge av tiltaket må avgrensast til eit minimum.

Anna lovverk

Vi gjer merksam på at vedtaket berre omfattar dispensasjon frå verneforskrifta i medhald av naturmangfaldlova. Nødvendige løyve etter anna lovverk må avklarast med rette myndigheiter.

Klage på vedtaket

Partane i saka eller andre med rettsleg klageinteresse kan klage på vedtaket innan tre veker frå det er mottatt. Klagen må vere grunngitt, og skal sendast til Statsforvaltaren. Miljødirektoratet avgjer klagen dersom Statsforvaltaren opprettheld vedtaket. Reglane om klage på vedtak går fram av kapittel VI i forvaltningslova.

Med helsing

Bjarne Otnes (e.f.)
fagleiar

Marita Fjelle
rådgivar

Dokumentet er elektronisk godkjent



Kopi til:

SMØLA KOMMUNE

Postboks 34

6571

SMØLA